



Siunnersuut uunga: Imigassat aalakoornartortallit pillugit Inatsisartut Inatsisaat nr. xx, ulloq xx.xx 2016-imeersoq.

(Peqqissutsimut Nunat Avannarliit Suleqatigiinnerannullu Naalakkersuisoq)
(Siullermeernera)

Demokraatini imigassat aalakoornartortallit pillugit inatsimmi allaqqasut annersaat iluarinngilagut. Inatsimmi innuttaasut kiffaanngissuseqarnerat mangiarneqarpoq aamma inerteqquteqarnerup iluani suliniutit arlallit iluaqutaanaviangillat taamaallaat paamisarneqartussaaput innuttaasut inatsisinik malinnittut aamma sulliviit.

Tassa imaappoq inatsisissatut siunnersuummi amerlasuut Demokraatini allanngortikkusuppagut. Aamma taamaattumik nuannaarutigaaqput maannakkuugallartoq eqqartoratsigu siunnersuutaanaq.

Kisianni atagu aallaqqaasiutigalugu oqaluttuarilara suut iluarinerlutigit. Iluarilluinnarparput siunnersuut manna aqutigalugu sassaalliisarfiit sivilunerusumik ammasalissammata. Maluginiarparput, suliniut tamanna tapersorsorneqartoq politiinit. Paarlattuanilli aamma maluginiarparput sassaalliisarfiutillit naammagittaalliortut. Tassunga atatillugu oqaatigisariaqarparput, sassaalliisarfiutillit namminneq aalajangissammassuk sivilunerusumik ammasalernissamut periarfissiissut atorniarnelugu. Demokraatini nuannaarutigaaqput periarfissaqalermat, ataasiakkaat kiffaanngissusaat annertusineqassammat.

Tamatuma saniatigut isumaqarpugut pitsaasuusioq akuersissuteqarnermut aalajangiisartunik pilersitsinissaq, imigassanik aalakoornartortalinnik nioqquteqarsinnaanermut sassaalliteqarsinnaanermut akuersissummik tunniussisartussamik. Isumaqarpugilli inuttalersuinissamut siunnersuut kukkusoq. Isumaqarpugut sassaalliisarfiutillit sinniisoqarnerusariaqartut aamma isumaqarpugut Kommunalbestyrelsimit toqqakkat marluusariaqanngitsut. Ilaasorta q ataaseq naammaqaaq.

Niuertarfinni imigassat aalakoornartortallit asserneqartalernissaat eqqarsaatigalugu isumaqarpugut pinnguartoqartoq. Niuertarfinnut aningaasartuutaassaaq akit qaffannerannik kinguneqartumik. Isuma tamanna erngiinnarluinnaq peertariaqarparput.

Paarlattuanik innuttaasut niuertarfiillu periarfisseriatsigit nammineq aalajangiinissaannut. Taamaattumik siunnersuutigaaqput niuertarfiit ammanertik tamakkerlugu imigassanik aalakoornartortalinnik nioqquteqarsinnaasariaqartut - killilersuisoqassanngilaq. Taamaaliornikkut niuertarfiit innuttaasullu pisarissersorunnaassavagut. Tamatumani



oqartoqassajunnarsivoq taamatut kiffaangissuseqarneq innuttaasut ilaasa artussagaat. Taamaattumik ingerlaannaq oqaatigissavarput; Demokraatini innuttaasut tatigaagut. Isumaqarpugut imerajuttut amerlanerulernaviangitsut aamma meeqqat sumiginnakkat amerliumaartut, inuit piumalleraangata imigassanik aalakoornartortalinnik pisisinnaangortikkutsigit.

Eqqaamassavarput imerajuttuuneq nappaataammat aamma imerajuttup imigassani pissarsiarillarumaarmagu niuertarfiit ammappata ammannikkaluarpataluunniit. Taamaattumik killilersuutissatut siunnersuutaasut Demokraatini tapersersunngilagut.

Aamma imigassanik aalakoornartortalinnik suut pilerisaarutigineqartassanersut pilersaarutigineqartassannginnersullu inerteqqutaalersinnissaanut siunnersuut ilalinngilarput. Tamanna niuertarfiit namminneq aalajangiinissaannut innarliinertut isigaarput. Tamatuma saniatigit inerteqquteqarnerit suunngitsumik sunniuteqartussaapput, nunat allat peqqusinnaanginnatsigit assigusunik inerteqquteqaleqqullugit. Nunami maani innuttaasut imigassamut aalakoornartortalimmut pilerisaarutit piseqqusaarutillu takusinnaajunartussaavaat aamma internetimi aamma nunat allamiut tv-mi kanaliini.

Takuneqarsinnaasutut tusaaneqarsinnaasutullu inatsimmi matumani suli suliassarpassuupput. Demokraatini taamaattumik maannagaaq siunnersuutigissuarput appassaaneerneqarnissaa pingajussaaneerneqarnissaalu 2017-mi Ukiakkut ataatsimiinnissamut kinguartinneqassasut, Peqqissutsimut Ataatsimiititaliaq piffissaqarluaqqullugu attuumassutilinnut tusarniaanissaminut.

Taamatut oqaaseqarluta siunnersuutip Peqqissutsimut Ataatsimiititaliami suliareqqinneqarnissaa innersuussutigaarput.